

MAS KAS NPES IB

Mas Kas Npes Ib, Zaj 1 thiab 2

**Tus vaj As Nthias Kus ntxias cov
Yus Das. 1 : 10 - 15 + 41 - 43 + 54 -
57 + 62 - 64.**

1 10 Ib tug ntsuag coj kev txhaum
hlav hauv Xis Lias teb tuaj : yog As

Nthias Kus Es Pis Fas, yog tus vaj As
Nthias Kus tus tub. Nws yog ib tug neeg
tau mus nyob txim nyob Los Mas.

11 Lub caij ntawd, muaj ib tiam neeg
tsis tsim txiaj sawv hauv tsoom His Xas
Lais tuaj. Lawv ntxias tau ntau leej.
Lawv hais tias :

"Peb kav tsij mus nrog lwm cov haiv neeg
uas nyob ncig peb sib fim. Vim tias txij
thaum peb ncaim ntawm lawv los lawm,
mas peb tau raug ntau yam xwv txheej."

12 Cov pej xeem ntau leej nyiam cov lus
ntxias no. 13 Lawv maj nroos mus thov
tus vaj kom nws kheev lawv coj cov kev
cai teev cov pej kum dab. 14 Lawv ua
ib lub tshav sib twv nyob Yes Lus Xas
Les xws li nyob pej kum teb. Lawv thim
lub Cim Txiaiv, thiab lawv nrauj kev nrog
Tswv Ntuj cog lus. 15 Lawv mus nrog
cov pej kum neeg coj dab sib fim. Lawv
ntxeev siab mus taug txoj kev phem.

41 Tus vaj As Nthias Kus tshaj rau nws
lub teb chaws tas tib si kom sawv daws
koom ua ib haiv neeg xwb.

42 Ces sawv daws ua raws li tus vaj cov
lus ceeb toom. Nyias tso nyias cov kev
cai pov tseg. 43 Muaj coob leej His Xas
Lais txais tus vaj txoj kev teev hawm.
Lawv txi dab thiab tsis caiv hnub xas
npas tos.

54 Hnub kaum tsib lub hlis Kis Laws
xyoo 145, tus vaj tsa lub thaj txi dab rau
saum cov Yus Das lub thaj txi Ntuj, thiab
nyob hauv cov nroog nyob ib ncig lawv

kuj tsa ib co thaj txi dab. 55 Nyob ntawm
tej tshav puam, ntawm tej rooj loog,
sawv daws hlawv txab txiv yoov.

56 Hos cov phau ntawv hais txog Mais
Xes Txoj Cai mas lawv muab dua thiab
muab hlawv tas.

57 Yog luag pom ib phau ntawv hais
txog Mais Xes Txoj Cai nyob hauv ib tug
tsev los luag pom ib tug neeg coj Txoj
Cai mas tus vaj ceeb toom kom muab tus
ntawd tua. 62 Tsis kav muaj coob leej
His Xas Lais kuj nyob ruaj nreb, lawv
muaj peev xwm tiv tsis kam noj tej yam
tsis huv.

63 Lawv yeem tuag zoo dua noj tej yam
tsis huv thiab ua txhaum rau Txoj Cai.
Ces muaj tus puav tau tuag tiag.

64 Nyob hauv cov His Xas Lais thiaj
muaj kev npau taws loj.

**Mas Tas Thias tsis kam mloog tus
vaj As Nthias Kus. 2 : 15 - 29.**

2 15 Tus vaj kom nws cov tub rog
mus hauv lub nroog Mos Dis.
Lawv tuaj yuam cov His Xas Lais kom
thim kev ntseeg thiab kom txi dab.

16 Muaj coob leej His Xas Lais mloog
cov tub rog. Tshuav Mas Tas Thias thiab
nws cov tub thiaj tsis mus nrog lawv txi
dab.

17 Tus vaj cov tub rog thiaj hais rau Mas
Tas Thias tias :

"Koj yog ib tug neeg nto koob meej thiab
muaj hwj chim nyob hauv lub nroog no,
koj coj tau sawv daws vim koj muaj tub
muaj kwv tij pab koj.

18 Ua li mas koj ua sawv daws ntej mus
raws li tus vaj cov lus ceeb toom. Koj ua
zoo li tas txhia haiv neeg, zoo li cov nom

Yus Das thiab cov uas peb tso nyob Yes Lus Xas Les. Ces koj thiab koj cov tub yuav nrog tus vaj ua phooj ywg zoo. Nej yuav tau txais nyiaj txais kub thiab txais ntau yam ua paj tshab."

19 Mas Tas Thias teb nrov nrov rau lawv tias :

"Tab yog tas txhua haiv neeg mloog tus vaj thiab ua raws li nws cov lus ceeb toom, thiab tso lawv cov yawg koob tej kev cai pov tseg, 20 los kuv thiab kuv cov tub cov kwv tij peb yuav ua raws li peb cov yawg koob tau cog lus xwb. 21 Thov kom Ntuj txuag peb, tsis txhob pub peb tso Txoj Cai thiab tej kev lij choj pov tseg ! 22 Peb yuav tsis mloog tus vaj cov lus. Peb yuav tsis txhob ncaim ntawm peb cov kev cai, peb tsis kam ncaim mus sab xis los sab laug li."

23 Thaum Mas Tas Thias lus tu nrho, muaj ib tug Yus Das tab meeg txav los rau sawv daws pom, nws txi dab nyob saum lub thaj nyob Mos Dis, raws li tus vaj cov lus ceeb toom. 24 Thaum Mas Tas Thias pom li ntawd mas nws siab mob ib zag thiab ua nws ib ce tshee tas. Nws npau taws heev, ces nws tib sas mus muab tus Yus Das caj dab txiav kiag nyob saum lub thaj.

25 Nws kuj tua tus neeg uas tus vaj xa tuaj yuam kom lawv txi dab. Ces nws rhuav lub thaj pov tseg. 26 Nws lub siab kub lug rau Txoj Cai xws li thaud Pis Nas siab kub lug ntaus Ntxis Lis uas yog Xas Lws tus tub.

27 Mas Tas Thias thiaj qw nrov nrov rau lub nroog tias :

"Yog leej twg kub siab rau Txoj Cai thiab tseem nco txog cov lus cog, mas kom nws tuaj raws kuv mus !"

28 Mas Tas Thias thiab nws cov tub khiau mus nyob pem roob, lawv tso lawv tej cuab yeej cuab tam rau hauv nroog.

29 Ces muaj coob leej uas nrhiav kev ncaj thiab nyiam Txoj Cai, lawv tsiv mus nyob hauv teb chaws suab puam.

Yus Das Mas Kas Npes ntxuav lub Tuam Tsev Teev Ntuj kom rov huv tuaj. 4 : 36 - 37 + 52 - 59.

4 36 Ces Yus Das thiab nws cov kwv tij hais tias :

"Peb cov yeeb ncuab tawg tas lawm, peb yuav mus ntxuav lub Tuam Tsev Teev Ntuj thiab rov muab rau Tswv Ntuj."

37 Tas tsoom tub rog tuaj sib sau thiab lawv nce mus pem lub roob Xis Yoos.

52 Lub hli Kis Laws hnub tim 25, xyoo 148, lawv sawv ntxov ntxov. 53 Lawv txi Ntuj nyob saum lub thaj txi Ntuj tshiab uas lawv ua tau.

54 Lawv foom hmoov zoo rau lub thaj, lawv ntaus thaj cheej, ntaus nkauj nog ncas, ntaus nruas. Thaum ntawd yog lub caij thiab lub hnub nyoog uas cov neeg teev pej kum dab tau ua tsis zoo rau lub thaj txi Ntuj.

55 Tas tsoom sid txhos caug hawm Tswv Ntuj. Lawv cav txog tus tau coj lawv mus rau txoj kev yeej.

56 Lawv ua lub txoos lom zem yim hnub los tsa lub thaj. Lawv hlawv tsiaj txi Ntuj, lawv ua tej thaj noj cov txim thiab ua Ntuj tsaug. Lawv zoo siab kawg.

57 Lawv muab nyiaj muab kub los tu kom lub Tuam Tsev sab nraud zoo nkauj. Lawv kho cov qhov rooj thiab lawv ua qhov rooj rau cov kem tsev pw. 58 Tas tsoom sid sawv daws zoo siab luag ntsuag qees. Lawv tsis nco qab lawv qhov txaj muag uas cov pej kum neeg ua rau lawv lawm.

59 Yus Das Mas Kas Npes nrog nws cov kwv tij thiab tas tsoom His Xas Lais txiav tias niadj xyoo thaum txog lub caij ntawd

lawv yuav rov ua lub hnub nyog tsa lub thaj txi Ntuj. Lawv nqaum paj nqaum nruas puv yim hnub, txij tim 15 Kis Laws mus. Lawv txiav tias lawv yuav ua lub hnub nyog ntawd nyob hauv txoj kev lom zem thiab zoo siab.

Tus vaj As Nthias Kus tuag.

6 : 1 - 13.

6 1 Tus vaj As Nthias Kus mus ncig xyuas cov xeev nyob pej fab. Nws hnov tias nyob Pes Xis teb muaj ib lub nroog hu ua Es Lis Mais uas nto koob meej kawg, vim lub nroog ntawd nplua nuj thiab muaj nyiaj muaj kub ntau.

2 As Les Xas Nros uas yog thawj tug vaj Mas Xes Dos Nias tau kav cov Hes Las, nws tau tso nws cov hmuv cov ntaj, cov cuab yeej ua rog nyob hauv lub Tuam Tsev nyob Es Lis Mais.

3 Tus vaj As Nthias Kus xav sim mus ntaus lub nroog ntawd kom nws tau cov nyiaj cov kub, tab sis nws ntaus tsis tau, vim cov neeg nyob hauv lub tsheej xub paub nws zaj tswv yim lawm. 4 Lawv xuas hmuv xuas ntaj tiv nws. Lawv ntaus nws tawg, ces nws khiav rov mus nyob Npas Npis Los, nws tu siab kawg.

5 Thaum As Nthias Kus nyob Pes Xis, luag tuaj hais rau nws tias nws cov tub rog tawg tas nyob Yus Das teb.

6 Lis Xias uas nws tau coj ib pab tub rog coob tau khiav vim nws ntshai cov Yus Das. Cov Yus Das muaj hmuv muaj ntaj

thiab lawv muaj ntau yam uas lawv txeeb tau ntawm cov tub rog pej kum los.

7 Cov Yus Das ntawd tau rhuav lub thaj txi dab uas As Nthias Kus tau tsa rau saum lub thaj txi Ntuj nyob Yes Lus Xas Les. Lawv tau tsa tej lub ntsa siab siab ib yam li thaum ub xov thaj chaw Ntshiab thiab xov lub nroog Npes Txus.

8 Tus vaj hnov li ntawd mas nws ntshai heev thiab nws ntxhov siab kawg. Ces nws pib mob thiab nws pw vim nws tu siab rau qhov nws ua tsis tau raws li nws xav.

9 Tus vaj nyob ob peb hnub li ntawd hauv txoj kev tu siab.

10 Thaum nws paub tias nws yuav tuag, nws hu nws cov phooj ywg tuaj tas huv tib si, nws hais rau lawv tias :

"Kuv lub qhov muag yuav qi me me tsis tau li, kuv lub siab ntxhov hnyo. 11 Kuv hais tias : Cas kuv thiaj tau txoj kev mob chim siab ? Cas thaum kuv tseem muaj hwj chim mas kuv ua zoo, thiab luag nyiam kuv kawg !

12 Tab sis nyem no kuv rov nco txog tias kuv tau ua phem rau Yes Lus Xas Les. Kuv tau nyiag tej cuab yeej nyiaj los kub nyob hauv Yes Lus Xas Les, thiab kuv tau xa cov Yus Das mus nyob txim dawb dawb, lawv tsis tau ua txhaum dab tsi li.

13 Kuv lees tias yog vim kuv tau ua li ntawd, mas nyem no kuv thiaj tau raug txoj kev txom nyem. Kuv tuag, kuv tu siab loj tas nrho nyob hauv ib lub teb chaws tsis yog kuv lub."

MAS KAS NPES OB

Mas Kas Npes Ob, Zaj 6 thiab 7

Es Les As Ntxas tuaj yeem tuag.

6 : 18 - 31.

6 18 Es Les As Ntxas yog ib tug nyob hauv cov thawj kws Txoj Cai. Nws muaj hnuh nyoog nchav lawm thiab nws coj ib lub meej mom muaj tsim. Cov nom tswv pej kum nyom nws qhov ncauj kom qhib, lawv yuam nws noj nqaij npuas. 19 Tab sis nws yeem muaj koob meej hauv txoj kev tuag dua ua lub neej muaj txhaum. Nws yeem nyiaj cia lawv ntaus nws.

20 Ces nws nti cov nqaij nyob hauv nws qhov ncauj pov tseg. Nws tsis ua zoo li cov uas noj tej yam caiv vim lawv nyiam lawv txoj sia.

21 Cov uas npaj rooj mov ntawd coj Es Les As Ntxas mus rau ib qho, vim lawv paub nws tau ntev los lawm. Lawv ntxias nws kom nws npaj ib co nqaij tsis caiv tso, thiab kom nws noj cov nqaij tsis caiv ntawd. Nws yuav ua txuj noj cov nqaij txi dab raws li tus vaj cov lus ceeb toom. 22 Yog nws ua li ntawd mas nws yuav tsis raug kev tuag, nws thiaj li yuav tau nyob nrog lawv ua phooj ywg ntev.

23 Tab sis Es Les As Ntxas yeem ua raws txoj kev ncaj uas nws tau taug los laus li no, txij thaum yau los lawm, thiab nws yeem ua raws Txoj Cai ntshiab uas Tswv Ntuj qhia. Ces nws teb rau lawv kom lawv xa nws mus hauv lub teb chaws tuag sai sai.

24 Es Les As Ntxas hais tias :

"Laus li peb no lawm tsis phim yuav dag, tsis phim yuav zais. Nyob tsam ntau leej hluas yuav to taub tias thaum Es Les As Ntxas muaj cuaj caum xyoo nws tau txais pej kum kev cai. 25 Ces yog vim qhov

kuv dag li ntawd, vim kuv ntshaw yav nyuag neej me me ntxiv, mas lawv thiab tau xav tswv yim yuam kev. Kuv qhov txhaum ntawd yuav coj kev txaj muag thiab kev poob koob meej tuaj rau kuv yav neej laus. 26 Tab nyem no kuv tsis raug neeg tua kuv, los ciaj tuag kuv yeej yuav dim tsis tau ntawm tus muaj hwj huam txhais tes. 27 Yog kuv ua siab tuag nyem no mas kuv lub neej laus thiab yuav tsim nyog dua. 28 Kuv thiaj yuav tso tau ib tug piv txwv zoo rau cov hluas pom. Kuv tuaj yeem tuag nyob hauv Txoj Cai ntshiab."

Thaum Es Les As Ntxas hais li ntawd tas, nws cia li txav los ze ntawm lawv kom lawv ntaus nws. 29 Cov neeg uas puag ta xav pab nws, nyem no lawv hloov siab tas lawm, vim lawv xav tias nws cov lus yog lus vwm xwb. 30 Thaum lawv ntaus Es Les As Ntxas, nws yuav tu siav txog tes, nws ncia ib suab thiab hais tias : "Tus HUAB TAIS paub tas puas tsav yam, nws pom tseeb tias kuv tsis xav tuag los tau. Tab sis kuv tuaj yeem nyiaj mob nyob hauv kuv lub cev, kuv tus plig zoo siab nyiaj li ntawd vim kuv hwm HUAB TAIS."

31 Es Les As Ntxas tuag li ntawd. Nws ua siab tawv. Nws tso ib tug piv txwv zoo rau cov hluas thiab rau peb haiv neeg tib si.

Xya leej kwv tij tuaj yeem nrog lawv niam tuag. 7 : 1 - 31 + 39 - 41.

7 1 Tus Vaj As Nthias Kus ntes tau xya leej kwv tij nrog lawv niam. Tus vaj yuam lawv kom lawv noj nqaij npuas uas lawv Txoj Cai txwv tsis pub

- noj. Nws kom xuas pas thiab xuas leeg nyuj plawm lawv.
- 2 Ib tug tub txawm sawv xya leej kwv tij thiab lawv niam chaw hais rau tus vaj tias :
 "Koj xav paub saib peb xav li cas. Mas peb yeem tuag zoo dua qhov hla peb cov yawg koob Txoj Cai."
- 3 Tus vaj npau taws heev, nws kom lawv muab ib lub yias los hlawa kom liab liab saum hlauv taws.
- 4 Thaum cov yias kub kub lawm, nws kom lawv muab tus tub ntawd hlais nplaig thiab laws nws daim tawv taub hau thiab txiav nws cov tes taw rau nws niam thiab nws cov kwv tij ntsia.
- 5 Thaum lawv ua li ntawd tas rau tus tub lawm, tus vaj kom lawv coj nws mus kib hauv yias, nws tseem ciaj. Thaum nws cov pa ncho hauv yias tuaj, mas nws cov kwv tij thiab nws niam lawv sib txhob tias kom sawv daws ua siab loj siab tawv tuag li ntawd thiab.
- 6 Lawv hais tias :
 "HUAB TAIS Tswv Ntuj pom peb, nws hlub peb raws li Mais Xes tau hais nyob hauv zaj Nkauj Paj Nruag tias nws yuav hlub nws cov tub txib."
- 7 Thawj tug tub tuag li ntawd tas, lawv coj tus ob mus. Lawv muab nws plaub hau dob, lawv laws nws daim tawv taub hau, lawv nug nws tias :
 "Cheem peb tseem tsis tau hlais koj ib ceg zuj zus tuaj, koj puas xav noj nqaij npuas ?"
- 8 Nws hais nws xeem lus tias :
 "Kuv tsis noj !"
 Ces lawv coj nws mus txhiab hlauv taws kom tuag. 9 Thaum nws yuav tuag, nws hais tias :
 "Ib tug neeg siab phem li koj, koj tsis pub peb ua neej nyob. Tab sis tus vaj kav lub ntiaj teb yuav tsa peb sawv rov los kom peb tau ib lub neej tsis txawj kawg, rau qhov peb tuag vim nws Txoj Cai."
- 10 Tus ob no tuag tas, lawv coj tus peb los. Lawv kom nws hlev nplaig, ces nws hlev nplaig tam sim ntawd thiab nws xyab nws ob txhais caj npab tam sim rau lawv.
- 11 Nws tseem muaj cuab kav hais tias :
 "Kuv txais kuv ob txhais tes no ntawm Ntuj los, vim nws tej kev cai mas kuv ntxub kuv ob txhais tes. Kuv tso siab tias nws yuav rov muab kuv ob txhais tes no rau kuv."
- 12 Tus vaj thiab nws cov neeg sawv daws ceeb tas tias vim li cas tus tub hluas ntawd yuav muaj lub siab loj kawg. Nws saib nws qhov txom nyem zoo li tsis muaj nqis dab tsi.
- 13 Nws txoj sia tu lawm, lawv kuj coj tus plaub los ua phem li ntawd rau thiab.
- 14 Thaum tus plaub yuav tuag, nws hais tias :
 "Kuv yeem tuag nyob hauv neeg txhais tes. Kuv tso siab tias Tswv Ntuj yuav tsa kuv ciaj rov los. Ntawm koj, mas koj yuav tsis tau ciaj rov los muaj txoj sia."
- 15 Ces lawv coj tus tsib los ua phem rau nws. 16 Nws ntsia tus vaj nruj nruj nws hais tias :
 "Koj kuj txawj tuag thiab. Tab sis koj muaj cai nyob saum neeg, koj ua rau neeg raws li koj nyiam. Tab sis koj tsis txhob xav tias peb haiv neeg no yog ib haiv neeg Tswv Ntuj tsis saib xyuas. 17 Tos tsis ntev, koj yuav tau pom Tswv Ntuj lub hwj chim loj. Koj yuav pom nws muab kev txom nyem rau koj thiab rau koj haiv neeg."
- 18 Tus tsib tuag, ces lawv mus coj tus rau los. Thaum nws yuav tuag txog tes, nws hais tias :
 "Koj tsis txhob xav tias koj yuav tau nyob kaj lug. Peb raug txom nyem them peb cov txim txhaum, vim peb ua txhaum rau

Tswv Ntuj. Vim li ntawd mas peb thiaj tau raug tej yam loj li no. 19 Tab sis ntawm koj mas koj txhob xav tias koj yuav tau zoo nyob li no mus li, vim koj tau tsa rog ntaus Tswv Ntuj."

20 Lawv niam kuj ua tej yam txaus qhuas kawg thiab tsim nyog yuav piav txog. Nws ntsia nws xya leej tub ib tug tuag zui zus nyob hauv tib hnub nkaus. Tsis kav nws ua ntsej muag luag ntxhi ris qhov ntawd vim nws tso siab rau Tswv Ntuj. 21 Leej niam hais nws niam nws txiv xeem lus ntuas nws cov tub ib leeg dhau ib leeg. Nws txawj xav zoo thiab txawj ntuas tej lo lus zoo kom nws cov tub muaj zog tuaj.

22 Leej niam hais rau lawv tias : "Kuv tsis paub nej xeeb zoo li cas los nyob hauv kuv lub cev. Tsis yog kuv muab txoj sia thiab lub tswv yim rau nej ! Tsis yog kuv tau tsim nej los zoo li nej nyem no. 23 Tus Tswv tsim lub ntiaj teb nws tsim kom neeg txawj yug los. Nws ua kom tas puas tsav yam muaj ib lub hauv paus chiv. Tswv Ntuj siab zoo, nws yuav rov muab txoj sia thiab lub tswv yim rau nej, vim nej tsis hlub nej lub cev nyem no, nej tsuas nyiam Tswv Ntuj Txoj Cai tshaj tas puas tsav yam."

24 Tus vaj As Nthias Kus xav tias cov lus ntawd yog lus thuam nws thiab cem nws. Thaum ntawd, tus tub yau tseem tsis tau tuag. Ces tus vaj thiaj ntxias tus tub yau tias yog nws tso nws cov yawg koob tej kev cai pov tseg mas tus vaj yeej cog lus tias yuav ua kom tus tub yau nplua nuj thiab kom nws tau zoo, yuav nrog nws ntaus phooj ywg zoo thiab yuav muab ib txog hauj lwm siab rau nws ua.

25 Tab sis tus tub ntxawg tsis mloog tus vaj cov lus. Ces tus vaj kom nws niam los ntuas nws tus tub kom tus tub rov cawm nws txoj sia. 26 Tus vaj hais ntev

loo, ces leej niam thiaj ua siab mus ntuas nws tus tub. 27 Nws ua txuj ua raws li tus vaj hais, nws khoov mus siv nws xeem lus hais lus rau nws tus tub tias :

"Me tub, koj hlub koj niam mog ! Koj niam tau nqa koj cuaj hlis nyob hauv nws xub ntiaj, tau pub mis rau koj noj peb xyoos, tau tu koj qhia koj los txog nyem no. 28 Me tub, koj ntsia lub ntuj thiab lub ntiaj teb, tas puas tsav yam nyob hauv. Koj yuav paub tias Tswv Ntuj muab tej yam me me los tsim xwb. Nws tsim neeg ib yam li ntawd. 29 Koj tsis txhob ntshai tus xav tua neeg ntawd, koj yuav ua raws li koj cov tij laug kom tsim nyog ua lawv tus kwv, koj ua siab tuag mog ! Thaum txog lub caij Ntuj zam kuv thiaj tau pom koj nrog lawv ua ke ."

30 Nws niam tseem hais tsis tau tas, tus tub twb hais tias :

"Nej tseem tos dab tsi ntxiv ? Kuv tsis mloog tus vaj cov lus, kuv yuav mloog Txoj Cai uas Mais Xes qhia rau peb cov yawg koob. 31 Koj uas yog tus coj t xo j kev txom nyem tuaj rau cov Hes Nplaws, koj yuav tsis dim ntawm Tswv Ntuj txhais tes."

39 Tus vaj npau taws heev. Nws ua heev tshaj cov rau tus tub ntxawg.

40 Tus tub yau tso nws t xo j sia tseg li ntawd, nws lub siab dawb paug. Nws tso siab lug rau Tswv Ntuj.

41 Ces leej niam tuag lawv nws cov tub qab.

Yus Das Mas Kas Npes txi Ntuj rau cov tuag kom yav tom ntej lawv tau sawv rov los. 12 : 43 - 46.

12 43 Yus Das sau tau ob txhiab tawm lub txiag, nws xa mus rau Yes Lus Xas Les, kom tau pub ib thaj t xi Ntuj them txim txhaum. Nws ua zoo li

Mas Kas Npes Ob, Zaj 12

ntawd, vim nws nco txog txoj kev yuav
sawv rov qab los.

44 Yog nws tsis ntseeg tias cov tub rog
tuag lawm yuav sawv rov qab los, mas
kev thov Ntuj rau cov tub tuag yog nkim
caij nkim zog xwb.

45 Thiab nws xav tias, cov neeg tuag
nyob hauv txoj kev teev Ntuj mas lawv
yuav tau txais paj tshab zoo nkauj.

46 Yus Das xav tau tswv yim zoo, ces
nws thiaj li ua ib thaj txi Ntuj them cov
tuag txim txhaum.